

ა(ა)იპ - საქართველოს სამოციქულო ავტოკეფალური მართლმადიდებელი ეკლესიის თბილისის სასულიერო აკადემიისა და სემინარიის აკადემიურ თანამდებობაზე 65 წლის ან მეტი ასაკის პირის არჩევისა და თანამდებობიდან გათავისუფლების, ემერიტუსის აკადემიური წოდების მინიჭებისა და ანაზღაურების მიცემის წესი და პირობები

მუხლი 1. 65 წლის ან მეტი ასაკის პირის აკადემიურ თანამდებობაზე არჩევისა და გათავისუფლების წესი

1. ააიპ - საქართველოს სამოციქულო ავტოკეფალური მართლმადიდებელი ეკლესიის თბილისის სასულიერო აკადემიისა და სემინარიის (ტექსტში შემდგომ - თსას-ი) აკადემიურ თანამდებობაზე 65 წლის ან მეტი ასაკის პირის აკადემიური თანამდებობის დაკავების საკითხი წყდება სასულიერო აკადემიისა და სემინარიის სამეცნიერო საბჭოს მიერ აკადემიური თანამდებობებისათვის განსაზღვრული ყოველი ცალკეული პოზიციისათვის საბჭოს დამსწრეთა უმრავლესობის გადაწყვეტილებით.

2. სამეცნიერო საბჭომ აკადემიურ თანამდებობაზე 65 წლის ან მეტი ასაკის პირთა დანიშვნის შესახებ გადაწყვეტილება შეიძლება მიიღოს მიზანშეწონილობიდან გამომდინარე, ცალკეული ფაკულტეტის ან ფაკულტეტის ცალკეული მიმართულებისათვის.

3. 65 წლის ან მეტი ასაკის თსას-ის აკადემიური პერსონალის თანამდებობიდან გათავისუფლების საკითხი რეგულირდება შესაბამისი შრომითი ხელშეკრულების, აკადემიის წესდების, აკადემიის სამართლებრივი აქტებისა და მოქმედი კანონმდებლობის საფუძველზე.

მუხლი 2. თსას-ში აკადემიური თანამდებობის მქონე პირისათვის ემერიტუსის აკადემიური წოდების მინიჭებისა და ანაზღაურების მიცემის წესი და პირობები

1. ააიპ - საქართველოს სამოციქულო ავტოკეფალური მართლმადიდებელი ეკლესიის თბილისის სასულიერო აკადემიისა და სემინარიის ემერიტუსი (შემდგომში – ემერიტუსი) წარმოადგენს სასულიერო აკადემიის მიერ კანონმდებლობის საფუძველზე დაწესებულ აკადემიურ წოდებას.

2. ემერიტუსის აკადემიური წოდება ენიჭება პირს, თუ ის ამ წოდების მინიჭების შესახებ განაცხადი აკმაყოფილებს შემდეგ მოთხოვნებს:

ა) არის 65 წლის ან მეტი ასაკისა;

ბ) უკავია აკადემიის პროფესორის ან/და მეცნიერი თანამშრომლის (ან მისი ეკვივალენტის¹) თანამდებობა;

¹მეცნიერი თანამშრომლის თანამდებობის ეკვივალენტს, სამუშაოს შინაარსიდან და სპეციფიკიდან გამომდინარე, განსაზღვრავს სამეცნიერო საბჭო.

გ) აქვს თბილისის სასულიერო აკადემიასა და სემინარიაში სამეცნიერო-პედაგოგიური მუშაობის არანაკლებ 20 წლის გამოცდილება, მათ შორის - პროფესორად მუშაობის არანაკლებ 10 წლისა.

დ) თავისი პედაგოგიური, საგანმანათლებლო და სამეცნიერო საქმიანობით მნიშვნელოვანი წვლილი შეიტანა აკადემიის ან/და შესაბამისი დარგის განვითარებაში.

3. ემერიტუსის აკადემიური წოდება პირს ენიჭება მისი განცხადებისა და შესაბამისი ფაკულტეტის წარდგინების საფუძველზე, სამეცნიერო საბჭოს გადაწყვეტილებით, თსას-ის რექტორის მიერ. უფლებამოსილ პირს შრომითი ხელშეკრულების ვადის გასვლამდე აქვს უფლება, მოითხოვოს ემერიტუსის აკადემიური წოდების მინიჭება, პროფესორის ან/და მეცნიერი თანამშრომლის თანამდებობიდან გათავისუფლების პირობით.

4. პირისათვის ემერიტუსის აკადემიური წოდების დადგენილი წესით მინიჭების საკითხი განიხილება და გადაწყვეტილება მიიღება სამეცნიერო საბჭოს მიერ სემესტრებს შორის პერიოდში. ემერიტუსის აკადემიური წოდების მინიჭებისთანავე იგი თავისუფლდება თსას-ის პროფესორის ან/და მეცნიერი თანამშრომლის თანამდებობიდან.

5. 65 წლის ან მეტი ასაკის თსას-ის პროფესორი ან/და მეცნიერი თანამშრომელი უფლებამოსილია მიიღოს გადაწყვეტილება და წარადგინოს განაცხადი ან ემერიტუსის აკადემიური წოდების მისანიჭებლად, ან აკადემიური თანამდებობის დასაკავებლად. იმ შემთხვევაში, თუ აკადემიური თანამდებობის დაკავებაზე განაცხადის წარადგენის შემდგომ პირი ვერ დაიკავებს პროფესორის თანამდებობას, იგი კარგავს ემერიტუსის აკადემიური წოდების მინიჭებაზე განაცხადის წარდგენის უფლებას.

6. თსას-ის ემერიტუსის აკადემიური წოდების მქონე პირს სასწავლებლის მიერ მიეცემა ყოველთვიური ანაზღაურება, რომელიც შეადგენს მისთვის ემერიტუსის აკადემიური წოდების მინიჭებაზე გადაწყვეტილების მიღებისას თსას-ში არსებული პროფესორის ყველაზე დაბალი თანამდებობრივი სარგოს 80 %-ს.

მუხლი 3. დამატებითი პირობები

1. ემერიტუსის აკადემიური წოდების მქონე პირმა შესაძლებელია მონაწილეობა მიიღოს თსას-ის საგანმანათლებლო და სამეცნიერო საქმიანობაში, შეასრულოს როგორც ანაზღაურებადი, ისე არაანაზღაურებადი სამუშაო აკადემიური, სამეცნიერო და დამხმარე/ადმინისტრაციული თანამდებობის დაკავების გარეშე.
2. ემერიტუსის აკადემიური წოდების მქონე პირმა, აკადემიის გადაწყვეტილებით, შესაძლებელია ისარგებლოს დამატებითი სოციალური გარანტიებით, შეუზღუდავად ისარგებლოს აკადემიის რესურსებით და აკადემიის მიერ დაწესებული სხვა შეღავათებით.

მუხლი 4. ემერიტუსის აკადემიური წოდების შეწყვეტა

1. პირს უწყდება ემერიტუსის აკადემიური წოდება, თუ გამოვლინდება, რომ მას წოდება მიენიჭა ამ წესის დარღვევით ან კანდიდატის მიერ არასწორი ინფორმაციის წარდგენის საფუძველზე.
2. თსას-ის ემერიტუსის აკადემიური წოდების მქონე პირს, მის მიერ სხვა უმაღლეს საგანმანათლებლო დაწესებულებაში აკადემიური, სამეცნიერო ან ადმინისტრაციული თანამდებობის დაკავების შემთხვევაში, თსას-ში უწყდება ყოველთვიური ანაზღაურება.

მუხლი 5. გარდამავალი დებულებები (ემერიტუსის აკადემიური წოდების მინიჭების დროებითი წესი)

1. ემერიტუსის აკადემიური წოდება ენიჭება 65 ან მეტი ასაკის პირს, რომელიც იმყოფება აკადემიასთან შრომით-სამართლებრივ ურთიერთობებში და ამ წოდების მინიჭების შესახებ განაცხადის წარდგენის დროს:

ა) წარმოადგენს თსას-ის მოქმედ თანამშრომელს, აქვს თბილისის სასულიერო აკადემიისა და სემინარიაში მუშაობის არანაკლებ 20 წლის გამოცდილება და თავისი პედაგოგიური, საგანმანათლებლო და სამეცნიერო საქმიანობით მნიშვნელოვანი წვლილი შეიტანა აკადემიის ან/და შესაბამისი დარგის განვითარებაში;

2. თსას-ში ემერიტუსის აკადემიური წოდების მქონე პირს აკადემიის მიერ მიეცემა ყოველთვიური ანაზღაურება:

ა) ამ მუხლის პირველი პუნქტის „ა“ ქვეპუნქტით გათვალისწინებული პირების ყოველთვიურ ანაზღაურებას განსაზღვრავს სამეცნიერო საბჭო. სამეცნიერო საბჭოს მიერ განსაზღვრული ანაზღაურება არ უნდა აღემატებოდეს ამ პირის მიერ ბოლო 2 წლის მანძილზე თსას-ში მუშაობის საშუალო თვიურ ანაზღაურებას; ანაზღაურების შესახებ

გადაწყვეტილების მიღებისას საბჭო ხელმძღვანელობს თავის მიერ დადგენილი კრიტერიუმებით.

მუხლი 6. დასკვნითი დებულებები

1. წინამდებარე წესი ამოქმედდეს დამტკიცებისთანავე.
2. წინამდებარე წესის მე-5 მუხლის მოქმედება შეწყდეს 2019 წლის 31 დეკემბერს.
3. პირს ემერიტუსის აკადემიური წოდება ენიჭება მის მიერ ამ წოდების მინიჭებაზე განაცხადის წარდგენის დროისათვის მოქმედი წესით და მასზე ვრცელდება ამ წესის თანმდევი სამართლებრივი შედეგები.
4. ემერიტუსის აკადემიური წოდების მქონე პირებისათვის ამ წოდების მინიჭებისას განსაზღვრული ანაზღაურების ოდენობა შეცვლას არ ექვემდებარება.
5. გადაწყვეტილება პირისათვის ემერიტუსის აკადემიური წოდების მინიჭების თაობაზე უნდა იქნეს მიღებული ამ წოდების მინიჭებაზე ფაკულტეტის წარდგენის დღიდან 6 თვეში.
6. წესში ცვლილების შეტანა ხორციელდება რექტორის ბრძანებით.